

Cultura taliana a l'università svizra

L'Institut da studis talians a Ligiaun metta ad ir in «bachelor»

DA GUIU SOBIELA-CAANITZ

■ **Dapi 1996 datti l'«Università della Svizzera Italiana» (USI; www.usi.ch) a Ligiaun e Mendrisio/TI. Tschellas universitads svizras portan il num d'ina citad; l'USI perencunter sa numna tenor il pajais ed in da ses quatter linguatgs. Ella cumpiglia mo trais facultads:** Informatica, ciencias da la comunicaziun e ciencias economicas, tuttas trais a Ligiaun, ed in «Accademia di architettura» a Mendrisio, manada da Mario Botta. 2007 ha il criticher litterar Carlo Ossola (*Turin 1946), commember da l'«Accademia nazionale dei Lincei», fundà in Institut da studis talians (ISI) (1) aifer la Facultad da ciencias da la comunicaziun a Ligiaun, per preparar al «master» da lingua, litteratura e cultura taliana.

Prelecziuns novas

Da settember 2012, cun l'onn academic 2012–2013, instradescha l'ISI la preparaziun ad in «bachelor» da trais onns da lingua, litteratura e cultura taliana che duai cumpigliar l'art e l'istorgia da l'Italia, sco era latin ed in'otra lingua (franzos, tudestg u englais). In fegl sgulant preschenta il «bachelor»; davart la cultura taliana pon ins leger: «Ella ha nudrì il mund cun ses maletgs: Il det da Dieu e quel da l'uman, sin la cassetta da la creaziun d'Adam en la 'Cappella Sistina', n'èn betg mo poesia e fresco, mabain quel simbol ch'ins reproducescha il pli savens en il mund, da las marcas postalas enfin a las stgattas da zulprins.» La prelecziun da «filologia neolatina ed entschatta da la litteratura (...) preschenta las etappas essenzialas dal svilup che ha manà dal latin popular a la cultura neolatina (...). Lura leg'ins ils emprims texts litterars dal 13avel tschientaner; lezs han ertà la renumada tradiziun poetica dals trubadurs che prosperava durant il 12avel tschientaner en la Frantscha dal sid. Suentar la scola siciliana (...) vegn il puntg suprem da la cultura medievale, recapitulaziun e culminaziun da la cultura medievale: La 'Commedia' da Dante [1265–1321] nua che l'entira Europa renconuscha anc oz las ragischs d'in'identitad cuminaivla.» Davart l'istorgia dal linguatg talian pon ins leger: «La prelecziun fa endament sias etappas fundamentalas, legend e commen-



Dapi 1996 datti l'«Università della Svizzera Italiana» che cumpiglia mo trais facultads: Informatica, ciencias da la comunicaziun e ciencias economicas, tuttas trais a Ligiaun.

tond texts significativs (...). Ins fa spezialmain attent ad insaquants temas centrals, sco la relaziun cun il latin, cun ils dialects e cun tschellas linguas, ubain la relevanza decisiva dals scripturs per codifitgar ed unifitgar la lingua.» I fa plaschair che lez program resguarda ils dialects talians, uschè impurtants per l'istorgia da la lingua. Il fegl sgulant preschenta sco suonda la prelecziun davart Roma e l'Europa en il temp medieval: «Roma era gia stada chapitala da l'Imperi roman e da la cristianadad. Ella è lura stada in dals motors principals da la construcziun da l'Europa ditg suenter la renaschientscha. Lezza istorgia fascinanta s'enragischa en il mitus, la fantasia, la simbolica da la pussanza e da la realitad culturala, religiusa e politica.»

Dante per il public da la citad

Davent dals 19 da settember 2012 avra l'ISI, cun prof. Ossola, ina da sias prelecziuns al public da la principala citad (passa 55 000 olmas) da la Svizra italo-

fona. Mintga mesemna a las 17.30, fin als 19 da december, danor ils 3 d'october, vegn legì e commentà ord la «Divina Commedia», cunzunt l'«Inferno», en l'«auditorio» dal «campus», e quai «sia per gli studenti che per la cittadinanza» (Ossola). Il renumà medievist Agostino Paravicini Bagliardi (*Bergam 1943), en sia prelecziun dals 10 d'october, tracta l'onn giubilar 1300 e papa Bonifaci VIII (Benedetto Caetani, †1303), e puspè Ossola, ils 7 da november, ils chants I e II da l'«Inferno». Lez fundatur e manader da l'ISI ha fatg endament la tradiziun svizra da dantologia e cunzunt il Bergiagliot Scartazzini (1837–1901): «Ses capodovra resta 'La Divina Commedia (...) riveduta nel testo e commentata' (Lipsia, 1874–82). Quest commentari è vegni modifitgà en l'ediziun scursanida (Milaun, 1893) da Giuseppe Vandelli ed è restà en questa furma per decennis il commentari da referenza» (2). Piero Martinoli, rector da l'USI, naschì 1941 ad Acquarossa (Val dal Blegn), ha

punctuà che la creaziun d'in «bachelor» da lingua, litteratura e cultura taliana e la spierta da «Lecturae Dantis» al public «miran a rinforzar, proteger e promover cultura e lingua taliana (...) er a nord da las Alps, per vivifitgar la varietad culturala en Svizra» («Corriere del Ticino», 30 da matg 2012). Martinoli: «Quai è in duair moral, era perquai che nus essan l'unica università italoфона ordaifer l'Italia». In auter giavisch da Martinoli fiss da crear in «master» da medischina clinica, oramai ch'il center cardiovascular da Ligiaun fa part da la Facultad da medischina da Turitg. Lez rom vegn segir pli impurtant oramai ch'ins cuntanscha ina vegliadetgna adina pli auta.

1. Via Lambertenghi 10A, 6904 Ligiaun. Fax 058 666 42 59. Posta electronica isi@usi.ch. Web www.isi.com.usi.ch.
2. Remo Fasani en: *Stiftung Historisches Lexikon der Schweiz* (ed.). *Lexicon Istorico Retic, tom 2. Cuir* (Desertina, ISBN 978-3-85637-391-7) 2012, p. 316, chavazzin «Scartazzini, Tommaso Andrea»